

Inatsisartut suleriaasianni § 37, imm. 1 naapertorlugu Naalakkersuisunut apeqquut imaattoq matumuuna saqqummiuppara:

Naalakkersuisunut apeqquutit:

1. Naalakkersuisut uppersarsinnaavaat Royal Greenlandip qullersaqarfianit oqaasiinnartigut neriorsuutigineqarsimasoq Attumit Kangaatsiamut saarulliit assartorneqarnerannut assartuinnermut tapiissuteqartoqassasoq, aammalu Naalakkersuisut ilisimatitsisinnaappat sooq neriorsuut tamanna suli eqquutsinneqarsimannginnersoq?
2. Royal Greenlandip aalisartunut aammalu illoqarfinni nunaqarfinnilu tunisassiorfinnut assartuinnermut tapiissutinik agguaassisarnermini suut naligiissumik, aalajangersimasumillu tunngavissat atorineqartarpat?
3. Naalakkersuisut 2024-mi, 2025-mi aammalu 2026-mi illoqarfiit nunaqarfiillu sorliit assartuinnermut tapiissutinik taamaattunik pissarsisimanersut, kiisalu sumiiffikkaartumik aningaasat ataatsimut amerlassusaat pillugit takussutissamik saqqummiussisinnaappat?
4. Naalakkersuisut piginnittutut qanoq qulakkeerniarpaa Attumi aalisartut nunaqarfinni allani aalisartunut assartuinnermut tapiissutinik assingusunik pissarsisartunut sanilliullugit assigiinngitsumik pineqannginnissaat?
5. Naalakkersuisut piginnittut aqutigalugit Royal Greenlandimut piumasariniarpaat suliaq pillugu ingerlaannaq nassuiaateqartoqassasoq, aammalu ingerlatseqatigiiffiup qullersaqarfianit neriorsuut uppersarsarneqarsinnaasoq eqquutsinneqassasoq, matumani ilanngullugu aalisartut tapiissutip amigaataanerata kingunerisaanik aningaasaqarnikkut annaasaqartinneqannginnissaat qulakkeerneqassasoq?
6. Assigiinngitsumik pineqartarnek taamatut ittoq sumiiffinni allani aamma pisarpa?

(Inatsisartunut ilaasortaq Jens Nap̃tôK', Naleraq)

Tunngavilersuut:

Paasissutissat naapertorlugit Attumi aalisartut Royal Greenlandip qullersaqarfianit oqaasiinnartigut neriorsorneqarsimapput Attumit Kangaatsiamut saarulliit assartorneqarnerannut assartuinnermut tapiissuteqartoqassasoq. Neriorsuuterli tamanna suli eqquutsinneqarsimanngilaq, naak paasissutissat naapertorlugit sumiiffinni allani assartuinnermut tapiissuteqartoqartartoq.

Namminersorlutik Oqartussanit pigineqartup ingerlatseqatigiiffiup nunaqarfinni aalisartunut erseqqissumik neriorsuuteqariarluni kingornatigut neriorsuutini eqqortinngippagu akuersarneqarsinnaanngilaq. Aalisartut ingerlatseqatigiiffiup

qullersaqarfianit paasissutissat neriorsuutillu tunniunneqartut tatigisinnaasariaqarpaat. Neriorsuut tunngavigalugu aalisarnerminnik pilersaarusiorsimasinnaapput aningaasartuutinillu tiguisimasinnaallutik.

Royal Greenlandip nammineq paasissutissiissutigisaani takutinneqarpoq Attumi tunisassiorfiup pisinnaasai killeqartut, aammalu ingerlatseqatigiiffik Attumi aningaasaliissutissanik nutaanik pilersaaruteqartoq ilisimatitsisimavoq. Najukkami tunisassiornerup pissutsit pissutigalugit Kangaatsiamut assartuisoqartariaqartillugu aningaasartuutit aalisartunut ataasiakkaanut ingerlaannaq akiligassanngortinneqassanngitsut. Tamanna Royal Greenlandip tunisassiorfiit pillugit takussutissiaani aammalu Attumi aningaasaliissutissatut pilersaarutigineqartut pillugit paasissutissani erserpoq.

Nunaqarfiit ilaat assartuinnermut tapiissutininik pissarsitinneqarpata, allat tunngavilersuutininik naapertuuttunik paasiuminartunillu saqqummiussivigineqarnatik itigartinneqartut nipangersimaannarsinnaanngilagut – ingammik tapiissut siusinnerusukkut neriorsuutigineqareersimappat. Taamaattumik Naalakkersuisut piginnittutut qulakkeertariaqarpaat ammasumik ingerlatsisoqarnissaa, naligiimmik pineqarnissaa, ataqqinnillunilu Royal Greenlandip aqutsisuisa aalisartunut neriorsuutigisimasaannut.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermit paatsuungasoqassatillugu kalaallisut allassimasooq aallaavigineqassaaq.